

四庫全書

集部

# 欽定四庫全書

集部

御定全唐詩錄卷五十五至

七

詳校官左中允<sub>臣</sub>瑋五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>田尹衡

謄錄監生<sub>臣</sub>馮堪

欽定四庫全書

御定全唐詩錄卷五十五

王建

建字仲初潁州人大歷十年登進士第辟魏博幕府入朝官昭應縣丞太和中轉太常寺丞終陝州司馬建與張籍同時相友善工為樂府歌行思遠格幽宮詞百首天下傳播倣此體者後雖有數家而建為之祖

古體詩

元日早朝

大國禮樂備萬邦朝元正東方色未動冠劍門已盈帝  
居在蓬萊肅肅鐘漏清將軍領羽林持戟巡宮城翠華  
皆宿陳雪仗羅天兵庭燎遠煌煌旗上日月明聖人龍  
虎衣寢殿開璇扃龍樓橫紫烟宮女天中行六蕃陪位  
次衣服各異形舉頭看玉牌不識宮殿名左右雉扇開  
蹈舞紛滿庭朝衣帶金玉珊珊相觸聲泰階備雅樂九

奏驚鳳鳴徘徊慶雲中  
竽磬寒鈴鈴三公再獻壽上帝  
錫永貞天明告四方羣后保太平

早發金堤驛

蟲聲四野合月色滿城白  
家家閉戶眠行人發孤驛離  
家尚苦熱衣服唯輕綌時節忽復遷  
秋風徹經脈人睡落塹轍馬驚入蘆荻  
慰遠時間程驚昏忽搖策從軍豈  
云樂憂患長縈積唯願在家貧團圓過朝夕

七泉寺上方

長年好名山本性今得從回首塵蹟遙稍見麋鹿踪老  
僧雲中居石門青重重陰泉養成龜古壁飛却龍掃石  
禮新經懸幡上高峰日夕猿鳥合覓食聽山鐘將火尋  
遠泉煮茶傍寒松晚隨收藥人便宿南澗中晨起衝路  
行濕花枝茸茸歸依向禪師願作香火翁

溫門山

早入溫門山羣峰亂如戟崩崖欲相觸呀豁斷行跡脫  
屐尋淺流定足畏歌石路盡十里溪地多千歲栢洞門

晝陰黑深處惟石壁似見丹砂光亦聞鍾乳滴靈池出  
山底沸水衝地脈暖氣成溫烟濛濛牕中白隨僧入古  
寺便是雲外客月出天氣涼夜鐘山寂寂

將歸故山留別杜侍御

有川不得涉有路不得行沈沈百憂中一日如一生錯  
來干諸侯石田廢春耕虎戟衛重門何因達中誠日月  
俱照耀山川異陰晴如何百里間開目不見明我今歸  
故山誓與草木并願君去丘坂長使道路平

送張籍歸江東

清泉漱塵鎬靈藥釋昏狂君詩發大雅正氣回我腸復  
令五彩姿潔白歸天常昔歲同講道青襟在師傍出處  
兩相因如彼衣與裳行行成歸計離我適咸陽失意未  
還家馬蹄盡四方訪餘咏新文不倦道路長僮僕懷昔  
念亦如還故鄉相親惜晝夜寢息不異床猶將在遠道  
忽忽起思量黃金未為累無以挹酒漿所念俱貧賤安  
得相發揚廻車遠歸省舊宅江南廂歸鄉非得意但貴



情義彰五月天氣熱波濤毒於湯慎勿多飲酒藥膳願  
自強

送韋處士老舅

憶昨癡小年不知有經籍常隨童子遊多向外家劇偷  
花入鄰里弄筆書牆壁照水學梳頭應門未穿幘人前  
賞文性梨栗蒙不惜賦字咏新泉探題得幽石自從出  
闕輔三十年作客風雨一飄飄親情多阻隔如何二千  
里塵土驅蹇瘠良久陳苦辛從頭嘆衰白既來今又去

暫笑還成戚落日動征車春風卷離席雲臺觀西路華  
嶽祠前栢會得過帝鄉重尋舊行蹟

送人

白日向天沒黃河復東流人生足著地寧免四方游我  
行無返顧況子勿回頭當須向前去何用起離憂但恐  
無廣路平地作山丘令我車與馬欲疾反停留蜀客多  
積貨邊人易封侯男兒戀家鄉歡樂為仇讐丁寧相勸  
勉苦口辛無尤對面無相成不如豺虎儔彼遠不寄書

此寒莫寄裘與君俱絕蹟兩念無因由

白紵歌二首

天河漫漫北斗燦宮中烏啼知夜半新縫白紵舞衣成  
來遲邀得吳王迎低鬟轉面掩雙袖玉釵浮動秋風生  
酒多夜長夜不曉月明燈光兩相照後庭歌聲更窈窕  
館娃宮中春日暮荔枝木瓜花滿樹城頭烏棲休擊鼓  
青娥彈瑟白紵舞夜天瞳瞳不見星宮中火照西江明  
美人醉起無次第隨釵遺佩滿中庭此時但願可君意

迴晝為宵亦不寐年年奉君君莫棄

溫泉宮行

十月一日天子來青繩御路無塵埃宮前內裏湯各別  
每個白玉芙蓉開朝元閣在山上起城繞青山籠暖水  
夜開金殿看星河宮女知更月明裏武皇得仙王母去  
山鷄晝啼宮中樹溫泉泱泱出宮流宮使年年修玉樓  
禁兵去盡無射獵日西麋鹿登城頭梨園弟子偷曲譜  
頭白人間教歌舞

隴頭水

隴水何年隴頭別不在山中亦鳴咽  
征人塞耳馬不行未到隴頭聞水聲  
謂是西流入蒲海還聞北去繞龍城  
隴東隴西多屈曲野廩飲水長簇簇  
胡兵夜回水傍住憶著來時磨劍處  
向前無井復無泉放馬回看隴頭樹

荆門行

江邊行人暮悠悠山頭殊未見荆州  
峴亭西南路多曲櫟林深深石鏃鏃  
看炊紅米煮白魚夜向鷄鳴店家宿

南中三月蚊蚋生黃昏不聞人語聲生紗帷踈薄如霧  
隔衣啗膚耳邊鳴欲明不待燈火起喚得官船過蠻水  
女兒停客茆屋新開門掃地桐花裏犬聲撲撲寒溪烟  
人家燒竹種山田巴雲欲雨熏石熱麋鹿過江蟲出穴  
大蛇過處一山腥野牛驚跳雙角折斜分漢水橫千山  
山青水綠荆門關向前問個長沙路舊是屈原沈溺處  
誰家丹旆已南來逢著流人從北去月明山鳥多不棲  
下枝飛上高枝啼主人念遠心不憚羅衫對舞章臺夕

紅燭交橫各自歸酒醒還是他鄉客壯年留滯尚思家  
况復白頭在天涯

田家行

男聲欣欣女顏悅人家不怨言語別五月雖熱麥風清  
簷頭索索綠車鳴野蠶在繭人不取葉間撲撲秋蛾生  
麥收上場絹在軸的知輸得官家足不望入口復上身  
且免向城賣黃犢田家衣食無厚薄不見縣門身即樂

田家留客

人客少能留我屋客有新漿馬有粟遠行僮僕應苦饑  
新婦厨中炊欲熟不嫌田家破門戶蠶房新地無風土  
行人但飲莫畏貧明府上來可苦辛丁寧回語房中妻  
有客勿令兒夜啼雙塚直西有縣路我教丁男送君去

賽神曲

男抱琵琶女作舞主人再拜聽神語新婦上酒勿辭勤  
使爾舅姑無所苦椒漿湛湛桂座新一雙長箭繫紅巾  
但願牛羊滿家宅十月報賽南山神青天無風水復碧



龍馬上鞍牛服輓紛紛醉舞蹈衣裳把酒路傍勸行客  
當窓織

歎息復歎息園中有棗行人食貧家女為富家織翁母  
隔牆不得力水寒手澁絲脫斷續來續去心腸爛草蟲  
促促機下啼兩日催成一疋半輸官上頭有零落姑未  
得衣身不著當窓却羨青樓倡十指不動衣盈箱

織錦曲

大女身為織錦戶名在縣家供進簿長頭起樣呈作官

聞道官家中苦難回花側葉與人別唯恐秋天絲綠乾  
紅樓歲蕤紫茸軟蝶飛參差花宛轉一梭聲盡重一梭  
玉腕不停羅裏卷窓中夜久睡髻偏橫釵欲墮垂著肩  
合衣卧時參沒後停燈起在鷄鳴前一足千金亦不賣  
限日未成官裏怪錦江水涸貢轉多宮中盡著單絲羅  
莫言山積無盡日百尺高樓一曲歌

羽林行

長安惡少出名字樓下劫商樓上醉天明下直明光宮

散入五陵松柏中百回殺人身合死赦書尚有收城功  
九衢一日消息定鄉吏籍中重改姓出來依舊屬羽林  
立在殿前射飛禽

### 水運行

西江運船立紅幟萬棹千帆繞江水去年六月無稻苗  
已說水鄉人餓死縣官部船日算程暴風惡雨亦不停  
在生有樂當有苦三年作官一年行壞舟畏鼠復畏漏  
恐向太倉折升斗辛勤耕種非毒藥看著不入農夫口

用盡百金不為費但得一金即為利遠徵海稻供邊食  
豈如多種邊頭地

水夫謠

苦哉生長當驛邊官家使我牽驛船辛苦日多樂日少  
水宿沙行如海鳥逆風上水萬斛重前驛迢迢後蘇蘇  
半夜緣堤雪和雨受他驅遣還復去衣寒衣濕披短蓑  
臆穿足裂忍痛何到明辛苦無處說齊聲騰踏牽船出  
一間茆屋何所直父母之邦去未得我願此水作平田

長使水夫不怨天

夢看梨花雲歌

薄薄落落霧不分  
夢中喚作梨花雲  
瑤池水光蓬萊雪  
青葉白花相次發  
不從地上生枝柯  
合在天頭遶宮闕  
天風微微吹不破  
白艷却愁春露浣  
玉房彩女齊看來  
錯認仙山鶴飛過  
落英散粉飄滿空  
梨花顏色同不同  
眼穿臂短取不得  
取得亦如從夢中  
無人為我解此夢

梨花一曲心珍重

墨莊漫錄云東坡作梅花詞云高情已逐晚雲空不與梨花同夢注云唐

王建有夢看梨花雲詩余歷求之及得其全篇或誤傳爲王昌齡非也

春詞

良人早朝半夜起櫻桃如珠露如水下堂把火送郎回  
移枕重眠曉窓裏

失釵怨

貧女銅釵惜於玉失却來尋一日哭嫁時女伴與作妝  
頭戴此釵如鳳凰雙杯行酒六親喜我家新婦宜拜堂  
鏡中乍無失髻樣初起猶疑在床上高樓翠鈿飄舞塵

明日從頭一遍新

寄遠曲

美人別來無處所  
巫山月明湘江雨  
千迴相見不分明  
井底看星夢中語  
兩心相對尚難知  
何況萬里不相疑

鏡聽詞

重重摩挲嫁時鏡  
夫婿遠行憑鏡聽  
回身不遣別人知  
人意丁寧鏡神聖  
懷中收拾雙錦帶  
恐畏街頭見驚怪  
嗟嗟嗒嗒下堂階  
獨自竈前來跪拜  
出門願不聞悲哀

郎在任郎回未回月明地上人過盡好語多同皆道來  
卷帷上床喜不定與郎裁衣失翻正可中三日得相見  
重繡鏡囊磨鏡面

北印行

北印山頭少間土盡是洛陽人舊墓舊墓人家歸葬多  
堆著黃金無買處天涯悠悠葬日促崗坂崎嶇不停轍  
高張素幙繞銘旌夜唱挽歌山下宿洛陽城北復城東  
魂車祖馬長相逢車轍廣若長安路蒿草少於松栢樹



澗底盤陀石漸稀盡向墳前作羊虎誰家古碑文字滅  
後人重取書年月朝朝車馬送葬回還起大宅與高臺

精衛詞

精衛誰教爾填海海邊石子青磊磊但得海水作枯池  
海中魚龍何所為口穿豈為空啣石山中草木無全枝  
朝在樹頭暮海裏飛多羽折時墮水高山未盡海未平  
願我身死子還生

鞦韆詞

長長絲繩紫復碧  
嫋嫋橫枝高百尺  
少年女兒重鞦韆  
盤中結帶分兩邊  
身輕裙薄易生力  
雙手向空如鳥翼  
下來立定重繫衣  
復畏斜風高不得  
傍人送上那足貴  
終賭鳴璫鬪自起  
回回若與高樹齊  
頭上寶釵從墮地  
眼前爭勝難為休  
足踏平地看始愁

題天台隱靜寺

隱靜靈山寺  
天鑿盃度飛來建巖壑  
五峯直上插銀河  
一澗當空瀉寥廓  
崆峒黯淡碧琉璃  
白雲吞吐紅蓮閣

不知勢壓天幾重鐘聲常在月中落

望夫石

望夫處江悠悠化為石不回頭山頭日日風復雨行人  
歸來石應語

雉將雛

雉呶呶雛出殼毛斑斑喙啄學飛未得一尺高還逐  
母行旋母脚麥壟淺淺難蔽身遠去戀雛低怕人時時  
土中鼓兩翅引雛拾蟲不相離

短歌行

人初生日初出上山遲下山疾百年三萬六千朝夜裏  
分將強半日有歌有舞湏早為昨日健於今日時人家  
見生男女好不知男女催人老短歌行無樂聲

飲馬長城窟

長城窟長城窟邊多馬骨古來此地無井泉賴得秦家  
築城卒征人飲馬愁不回長城變作望鄉堆蹄蹤未乾  
人去近續後馬來泥污畫枕弓睡著待水生不見陰山

在前陣馬蹄足脫裝馬頭健兒戰死誰封侯

行見月

月初生居人見月一月行行行一年十二月強半馬上  
看盈缺百年歡樂能幾何在家見少行見多不緣衣食  
相驅遣此身誰願長奔波篋中有帛倉有粟豈向天涯  
走碌碌家人見月望我歸正是道中思家時

遠將歸

遠將歸勝未別離時在家相見熟新歸歡不足去願車

輪遲回思馬蹄速但令在舍相對貧不向天涯金遶身

烏夜啼

庭樹烏爾何不向別處棲夜夜夜半當戶啼家人把燭  
出洞戶驚棲失羣飛落樹一飛直欲飛上天回回不離  
舊棲處未明重繞主人屋欲下空中黑相觸風飄雨濕  
亦不移君家樹頭多好枝

簇蠶辭

蠶欲老箔頭作繭絲皓皓場寬地高風日多不向中庭

瞧蒿草神蠶急作莫悠揚年來為爾祭神桑但得青天  
不下雨上無蒼蠅下無鼠新婦拜簇願爾稠女灑桃漿  
男打鼓三日開箔雪團團先將新繭送縣官已聞鄉里  
催織作去與誰人身上著

促刺詞

促刺復促刺水中無魚山無石少年雖嫁不將歸頭白  
猶著父母衣四邊田宅非所有我身不及逐鷄飛出門  
若有歸死處猛虎當衢向前去百年不遺踏君門在家

誰喚為新婦豈不見他隣舍娘嫁來常在舅姑傍

銅雀臺

嬌愛更何日高臺空數層含啼映雙裏不忍看西陵漳  
水東流無復來百花輦路為蒼苔青樓月夜長寂寞碧  
雲日暮空徘徊君不見鄴中萬事非昔時古人不在今  
人悲春風不逐君王去草色年年舊宮路宮中歌舞已  
浮雲空指行人往來處

近體詩



昭應官舍

繞廳春草合知道縣家間行見雨遮院卧看人上山避  
風新浴後請假未醒間朝客輕卑吏從他不往還

長安春遊

騎馬傍間坊新衣著雨香桃花紅粉醉柳絮白雲狂不  
覺愁春去何曾得日長牡丹相次發城裏又湏忙

間居即事

老病貪光景尋常不下簾妻愁耽酒癖人怪考詩嚴小

婢偷紅紙嬌兒弄白髻有時看舊卷未免意中嫌

貧居

眼底貧家計多時總莫嫌  
蠹生騰藥紙字脫換書籤  
避雨拾黃葉遮風下黑簾  
近來身不健時就六壬占

山居

屋在瀑泉西茅簷下有溪  
閉門留野鹿分食養山鷄  
桂熟長収子蘭生不作畦  
初開洞中路深處轉松梯

新修道居

世間無所入學道處新成兩面有山色六時聞磬聲間  
加經遍數老愛字分明若得離煩惱焚香過一生

原上新居

新占原頭地本無山可歸荒藤生葉晚老杏著花稀厨  
舍近泥竈家人初飽薇弟兄今四散何日更相依  
一家榆柳新四面遠無鄰人少愁聞病莊孤幸得貧耕  
牛長願飽樵僕每憐勤終日憂衣食何由脫此身

長安無舊識百里是天涯寂寞思逢友荒涼喜見花訪

僧求賤藥將馬市豪家昨得新蔬菜朝盤忽覺奢

鳴鷄村舍遙花發亦蕭條野竹初生筍溪田未得苗家  
貧僮僕瘦春冷菜蔬焦甘分長如此無名在聖朝

自掃一間房唯鋪獨卧床野羹溪菜滑山紙水苔香陳  
藥初和白新經未入黃近來心力少休讀養生方

擬作讀經人空房置淨巾鎖茶藤篋密曝藥竹床新老  
病應隨業因緣不離身焚香向居士無計出諸塵

移家近佳村貧苦自安存細問梨果植遠求花藥根倩

人開廢井趁犢入新園長愛當山立黃昏不閉門

和暖遶林行新貧足喜聲掃渠憂竹旱洗地引蘭生山

客憑栽樹家僮使入城門前粉壁上書著縣官名

住處鐘鼓外免爭當路橋身閒時却困兒病可來嬌鸚

睡日陽暖蜂狂花艷燒長安足門戶疊疊看登朝

過來年紀到世事總無心古鶴憑人搦閒詩任客吟送

經還野院移石入幽林谷口春風惡梨花蓋地深

嬾更學諸餘林中掃地居膩衣穿不洗白髮短慵梳苦

相常多淚勞生自悟虛間行人事絕親故亦無書  
住處去山近傍園麋鹿行野桑穿井長荒竹過牆生新  
識隣里面未諳村社情名田無力及賤賃與人耕

冬夜感懷

晚年恩愛少耳目靜於僧一夜不聞語空房惟有燈氣  
噓寒被濕霜入破窻凝斷得人間事長如此亦能

惜懽

當懽須且懽過後買應難歲去停燈守花開把火看狂

來欺酒淺愁盡覺天寬次第頭皆白齊年人已殘

照鏡

忽自見憔悴壯年人亦疑髮緣多病落力為不行衰暖  
手揉雙目看圖引四肢老來真愛道所恨覓還遲

南中

天南多爲聲州縣半無城野市依蠻姓山村逐水名瘴  
烟沙上起陰火雨中生獨有求珠客年年入海行

醉後憶故人山中

花開草復秋雲水自悠悠因醉暫無事在生難免愁  
過晴湏看月鬪健且登樓暗想山中伴如今盡白頭

送李評事使蜀

勸酒不依巡明朝萬里人轉江雲棧細近驛板橋新  
石冷啼猿影松昏戲鹿塵少年為客好况是益州春

送吳郎中赴忠州

西臺復南省清白上天知家每因窮散官多為直移  
巡邊過驛近買藥出城遲朝野憑人別親情伴酒悲故園



愁去後白髮想回時何日忠州界山頭卓望旗

杜中丞書院新移小竹

此地本無竹遠從山寺移經年求養法隔日記澆時嫩  
綠卷新葉殘黃收故枝色經寒不動聲與靜相宜愛護  
出常數稀稠看自知貧家緣未有客散獨行遲

上陽宮

上陽花木不曾秋洛水穿宮處處流畫閣紅樓宮女笑  
玉簫金管路人愁幔城入澗橙花發玉輦登山桂葉稠

曾讀列仙王母傳九天未勝此中游

聞說

桃花百葉不成春鶴壽千年也未神秦隴州緣鸚鵡貴  
王侯家為牡丹貧歌頭舞遍回回別鬢樣眉心日日新  
鼓動六街騎馬出相逢總是學狂人

初授大府丞言懷

除書亦下屬徵班喚作官曹便不閒檢案事多關市井  
聽人言志在雲山病童喚著唯行慢老馬鞭多轉放頑

此去仙宮無一里遙看松樹衆皆攀

晚秋病中

萬事風吹過耳輪  
貧兒活計亦曾聞  
偶逢新語書紅葉  
難得閒人話白雲  
霜下野花渾著地  
寒來溪鳥不成羣  
病多體痛無心力  
更被頭邊藥氣熏

歲晚自感

人皆欲得長年少  
無那排門白髮催  
一向破除愁不盡  
百方迴避老須來  
草堂未辦終須置  
松樹難成亦且栽

漉酒願從今日後更逢二十度花開

自傷

衰門海內幾多人滿眼公卿總不親  
四授官資元七品再經婚娶尚單身  
圖書亦為頻移盡兄弟還因數散貧  
獨自在家常似客黃昏哭向野田春

春日五門西望

百官朝下五門西塵起春風過御堤  
黃帕蓋鞍呈過馬紅羅繫項鬪回雞  
館松枝重墻頭出御柳條長水面齊

唯有教坊南草綠古苔陰地冷淒淒

武陵春日

尋春何事却悲涼春到他鄉憶故鄉  
秦女洞桃歌澗碧楚王堤柳舞烟黃  
波濤入夢家山遠名利關身客路長  
不似冥心叩麈寂玉編金軸有仙方

江陵即事

瘴雲梅雨不成泥十里津樓壓大堤  
蜀女下沙迎水客巴童傍驛賣山鷄  
寺多紅藥燒人眼地足青苔染馬蹄

夜半獨眠愁在遠北看歸路隔蠻溪

題元郎中新宅

近移松樹初栽藥經帙書籤一切新鋪設暖房迎道士  
支分間院著醫人買來高石雖然貴入得朱門未免貧  
惟有好詩名字出倍教年少損心神

薛二十池亭

一作姚  
合詩

每日樹邊消一日遶池行匝又須行異花多是非時有  
好竹皆當要處生斜豎小橋看島勢遠移幽石作泉聲

浮萍著岸風吹歇水面無塵晚更清

郭家溪亭

高亭望見長安樹春草崗西舊院斜  
光動綠烟遮岸竹粉開紅艷塞溪花  
野泉聞洗親王馬古柳曾停貴主車  
妝閣書樓傾側盡雲山新賣與官家

題金家竹溪

少年因病離天仗乞得歸家自養身  
買斷竹溪無別主散分泉水與新隣  
山頭鹿下長驚犬池面魚行不怕人

鄉使到來常歎語還聞世上有功臣

逍遙翁溪亭

逍遙翁在此徘徊帝改溪名起石臺車馬到春常借問  
子孫因選暫歸來稀疎野竹人移折零落蕉花雨打開  
無主青山何所直賣供官稅不如灰

故梁園公主池亭

一作姚  
合詩

平陽池館接秦川門鎖南山一朵烟素柰花開西子面  
綠楊枝散沈郎錢裝檐玳瑁隨風落傍岸鷓鴣逐暖眠



寂寞空餘歌舞地玉簫聲絕鳳歸天

題柱國寺

皇帝施錢修此院半居天上半人間  
丹梯暗出三重閣古像斜開一面山  
松栢自穿空地少川原不稅小僧閒  
行香天使長相續早起離城日午還

題石甕寺

青崖古寺夾城東泉脈鐘聲內裏通  
地壓龍蛇山色別屋連宮殿匠名同  
簷燈經夏紗籠黑溪葉先秋臘樹紅

天子親題詩總在畫屏長鑠碧龕中

上杜元穎相公

學士金鑾殿後居天中行坐侍龍興承恩不許離床謝  
密詔長教倚案書馬上喚遮紅嘴鴨船頭看釣赤鱗魚  
間曹散吏無相識猶記荊州拜謁初

問少保

髭鬚雖白體輕健九十三來却少年問事愛知天寶裏  
識人皆是武皇前玉裝劍珮身長帶絹寫方書子不傳

侍女常時教合藥亦聞私地學求仙

贈崔禮駙馬

鳳凰樓閣連宮樹天子崔郎自愛貧  
金埒減添栽藥地玉鞭平與賣書人  
家中絃管聽常少分外詩篇看即新  
一月一回陪內宴馬蹄猶厭踏香塵

贈王樞密

三朝行坐鎮相隨今上春宮見長時  
脫下御衣偏得著進來龍馬每教騎  
長承密旨歸家少獨奏邊機出殿遲

不是當家頻向說九重爭得外人知

紀事云建初為渭南尉值內官王樞

密者盡宗人之分然彼我不均復懷輕謗之色忽過飲語及漢桓靈信任中官起黨錮興廢之事樞密深憾其譏乃曰吾弟所有宮詞天下皆誦於口禁掖深邃何以知之建不能對後賦此詩贈之乃脫其禍一云即守澄也

### 寄楊十二祕書

初移古寺正南方靜是浮山遠是莊人定猶行背街鼓  
月高還去打僧房新詩欲寫中朝滿舊卷常抄外國將  
閒出天門醉騎馬可憐蓬閣祕書郎

送宮人入道

休梳叢鬢洗紅妝頭戴芙蓉出未央  
弟子抄將歌遍疊宮人分散舞衣裳  
問師初得經中字入靜猶燒內裏香  
發願蓬萊見王母却歸人世施仙方

御定全唐詩錄卷五十五

欽定四庫全書

御定全唐詩錄卷五十六

王建

二

近體詩

二

故行宮

寥落古行宮宮花寂寞紅  
白頭宮女在閒坐說玄宗

新嫁娘

三日入厨下洗手作羹湯  
未諳姑食性先遣小姑嘗

宮詞

金殿當頭紫閣重仙人掌上玉芙蓉  
太平天子朝元日  
五色雲車駕六龍

蓬萊正殿壓金鰲紅日初生碧海濤  
開著五門遙北望  
赭黃新帕御床高

殿前傳點各依班召對西來八詔蠻  
上得青花龍尾道  
側身偷覲正南山

籠烟日氣紫瞳瞳宣政門當玉殿風  
五刻閣前卿相出



下簾聲在半天中

白玉窓中起草臣櫻桃初出賜嘗新  
殿頭傳語金階遠只進詞來謝聖人

內人對御疊花牋繡坐移來玉案邊  
紅蠟光中呈草本平明舁出閣門宣

千牛仗下放朝初玉案傍邊立起居  
每日請來金鳳紙殿頭無事不教書

未明開著九重闕金畫黃龍五色幡  
直到銀臺排仗合

聖人三殿冊西番

少年天子重邊功親到凌烟畫閣中  
教覓勲臣寫圖本  
長將殿裏作屏風

丹鳳樓門把火開五雲金輅下  
天來堦前走馬人宣慰  
天子南郊一宿回

樓前立仗看宣赦萬歲聲長再拜齊  
日照彩盤高百尺  
飛仙爭上取金鷄

集賢殿裏圖書滿點勘頭邊御印同  
真跡進來依字數

別收鎖在玉函中

秘殿清齋刻漏長  
紫薇宮女夜焚香  
拜陵日到公卿發  
鹵簿分頭入太常

新調白馬拍鞭聲  
供奉騎來遶殿行  
為報諸王侵早入  
隔門催進打毬名

對御難爭第一籌  
殿前不打背身毬  
內人唱好龜茲急  
天子鞘回過玉樓

新衫一樣殿頭黃  
銀帶排方獺尾長  
總把金鞭騎御馬

綠髻紅額麝香香

羅衫葉葉繡重重金鳳銀鶯各一叢  
每遍舞頭分兩向  
太平萬歲字當中

魚藻宮中鎖翠娥先皇行處不曾過  
如今池底休鋪錦  
菱角雞頭積漸多

殿前明日中和節連夜瓊林散舞衣  
傳報所司分蠟燭  
監開金鎖放人歸

五更三點索金車盡放宮人出看花  
仗下一時催立馬

殿頭先報內園家

城東北面望雲樓  
半下珠簾半上鉤  
騎馬行人長遠過  
恐防天子在樓頭

射生宮女宿紅妝  
請得新弓各自張  
臨上馬時齊賜酒  
男兒跪拜謝君王

新秋白兔大於拳  
紅耳霜毛趁草眠  
天子不教人射殺  
玉鞭遮到馬蹄前

內鷹籠脫解紅絛  
鬪勝爭飛出手高  
直上碧雲還却下

一雙金爪菊花毛

競渡船頭掉綵旗兩邊潑水濕羅衣池東爭向池西去  
先到先書上字歸

燈前飛入玉堦蟲未卧常聞半夜鐘看著中元齋日到  
自盤金線繡真容

一時起立吹簫管得寵人來滿殿迎整頓衣裳皆著節  
舞頭當拍第三聲

琵琶先抹六么頭小管丁寧側調愁半夜美人雙起唱

一聲聲出鳳凰樓

春池日暖少風波  
花裏牽船水上歌  
遙索劍南新樣錦  
東宮先釣得魚多

十三初學擘箏篴  
弟子名中被點留  
昨日教坊新進入  
並房宮女與梳頭

紅蠻捍撥帖胸前  
移坐當頭近御筵  
用力獨彈金殿響  
鳳凰飛下四條絃

春風吹雨灑旗竿  
得出深宮不怕寒  
誇道自家能上馬

園中橫過覓人看

粟金腰帶象牙錐散插紅翎玉突枝  
旋獵一邊還引馬  
歸來花鴨遶鞍垂

雲駮花驄各試行  
一般毛色一般纓  
殿前來往重騎過  
欲得君王別賜名

每夜停燈熨御衣  
銀熏籠底火霏霏  
遙聽帳裏君王覺  
上直鐘聲始得歸

因喫櫻桃病放歸  
三年著破舊羅衣  
內中人識從來去



結得金花上貴妃

欲迎天子看花去  
下得金階却悔行  
恐見失恩人  
舊院  
回來憶著五絃聲

往來舊院不堪修  
近勅宣徽別起樓  
聞有美人新進入  
六宮未見一時愁

自誇歌舞勝諸人  
恨未承恩出內頻  
連夜宮中修別院  
地衣簾額一時新

悶來無處可思量  
旋下金階旋下床  
收得山丹紅藍粉

窓中洗却麝香黃

合暗報來門鎖了夜深應別喚笙歌房房下著珠簾睡  
月過金堦白露多

御厨不食索時新每見花開即苦春白日卧多嬌似病  
隔簾教喚女醫人

叢叢洗手遶金盆旋拭紅巾入殿門衆裏遙拋金橘子  
在前收得便承恩

御池水色春來好處處分流白玉渠密奏君王知入月

喚人相伴洗裙裾

移來女樂部頭邊  
新賜花檀大五絃  
纏得紅羅手帕子  
心中更畫一雙蟬

新晴草色綠溫暾  
山色初消水漸渾  
今日踏青歸校晚  
傳聲留著望春門

兩樓新換珠簾額  
中尉明朝設內家  
一樣金盤五千面  
紅酥點出牡丹花

舞送香毬出內家  
記巡傳把一枝花  
散時各自燒紅燭

相逐行歸不上車

家常愛著舊衣裳空插紅梳不作妝忽地下堦裙帶解  
非時應得見君王

別勅教歌不出房一聲一遍奏君王再三博士留殘拍  
索向宣徽作徽章

私縫黃帔捨釵梳欲得金仙觀內居近被君王知識字  
收來案上檢文書

行中第一爭先舞博士傍邊亦被欺忽覺管絃偷破拍

急翻羅袖不教知

日冷天晴近臘時  
玉階金瓦雪淅淅  
浴堂門外抄名入  
公主家人謝面脂

未承恩澤一家愁  
乍到宮中憶外頭  
新學管絃聲尚澁  
側商調裏唱伊州

東風潑火雨新休  
昇盡春泥掃雪溝  
走馬犢車當御路  
漢陽公主進雞毬

風簾水閣壓芙蓉  
四面鉤欄在水中  
避熱不歸金殿宿

秋河織女夜燈紅

聖人生日明朝是私地先湏屬內監自寫金花紅膀子  
前頭先進鳳凰衫

避暑昭陽不擲盧井邊含水噴鴟雛內中數日無呼喚  
搦得滕王蛺蝶圖

內宴初休入二更殿前燈火一天明中宮傳旨音聲散  
諸院門開觸處行

玉蟬金雀三層插翠髻高叢綠鬢虛舞處春風吹落地

歸來別賜一頭梳

樹葉初成爲護窠石榴花裏笑聲多衆中遺却金釵子  
拾得從他要賞羅

小殿初成粉未乾貴妃姊妹自來看爲逢好日先移入  
續向街西索牡丹

內人相續報花開准擬君王使看來縫著五絃琴繡袋  
宜春院裏按歌回

巡吹慢遍不相和暗數看誰曲校多明日梨園花裏見

先湏逐得內家歌

黃金合裏盛紅雪重結香羅四出花一一傍邊書勅字  
分明送與大臣家

未明東上閣門開排仗聲從後殿來阿監兩邊相對立  
遙聞索馬一時回

宮人拍手笑相呼不識庭前掃地夫乞與金錢爭借問  
外頭還似此間無

小隨阿姊學吹笙好見君王乞賜名夜拂玉牀朝把鏡



黃金堦下不教行

日高殿裏有香烟萬歲聲長動九天  
妃子院中初降誕  
內人爭乞洗兒錢

殿前鋪設兩邊樓寒食宮人步打毬  
一半走來爭跪拜  
上棚先謝得頭籌

太儀前日暖房來囑向昭陽乞藥裁  
勅賜一窠紅躑躅  
謝恩未了奏花開

牀前謝賜紫羅襦不下金堦上軟輿  
宮局總來為喜樂

院中新拜內尚書

鸚鵡誰教轉舌關  
內人手裏養來姦  
語多更覺承恩澤  
數對君王憶隴山

分明閒坐賭櫻桃  
收却投壺玉腕勞  
各把沈香雙陸子  
局中鬪鬩阿誰高

禁寺紅樓內裏通  
笙歌引駕夾城東  
裏頭宮監堂前立  
手把牙筍竹彈弓

春風院院落花堆  
金鎖生衣掣不開  
更築歌臺起妝殿

明朝先進畫圖來

舞來汗濕羅衣徹樓上人扶下玉梯歸到院中重洗面  
金盆水裏潑銀泥

宿妝殘粉未明天總在昭陽花樹邊寒食內人長白打  
庫中先散與金錢

衆中愛得君王笑偷把金箱筆硯開書破紅蠻隔子上  
旋推當直美人來

教遍宮娥唱遍詞暗中頭白没人知樓中日日歌聲好

不問從初學阿誰

青樓小婦研裙長總被抄名入教坊  
春設殿前多隊舞  
棚頭各別請衣裳

艾心芹葉初生小祇鬪時新不鬪花  
總待大家般數盡  
袖中拈出鬱金芽

玉簫改調箏移柱催換紅羅繡舞筵  
未戴柘枝花帽子  
兩行宮監在簾前

窻窻戶戶院相當總有珠簾玳瑁床  
雖道君王不來宿

帳中長是炷牙香

雨入珠簾滿殿涼  
避風新出玉盆湯  
內人恐要秋衣著  
不住熏籠換好香

金吾除夜進儺名  
畫袴朱衣四隊行  
院院燒燈如白日  
沈香火底坐吹笙

樹頭樹底覓殘紅  
一片西飛一片東  
自是桃花貪結子  
錯教人恨五更風

宮花不共外邊同  
正月長生一朶紅  
供御櫻桃看守別

直無鷓鴣到園中

紅燈睡裏喚春雲月上三更直宿分金砌雨來行步滑  
兩人擡起隱花裙

蠶鬚蟬翅薄鬆鬆浮動搔頭似有風一度出時拋一遍  
金條零落滿函中

步行送入長門裏不許來辭舊院花只恐他時身到此  
乞求恩赦放還家

嫌羅不著索輕繡對面教人染褪紅衫子成來一遍出

今朝看處滿園中

後宮宮女無多少起得園中笑一團舞蝶落花相看著  
春風共語亦應難

忽地金輿向月陂內人接著便相隨却回龍武軍前過  
當殿教開卧鴨池

春來睡困不梳頭嬾逐君王苑北遊暫向玉花階上坐  
簸錢贏得兩三籌

彈棋玉指兩參差背局臨虛闕著危先打角頭紅子落

上三金字半邊垂

宛轉黃金白柄長青荷葉子畫駕驚把來不是呈新樣  
欲進微風到御床

供御香方加減頻水沈山麝每回新內中不許相傳出  
已被醫家寫與人

藥童食後送雲漿高殿無風扇小涼每到日中重掠鬢  
叉衣騎馬遶宮廊

畫作天河刻作牛玉梭金鑷綵橋頭每年宮女穿針夜



勅賜諸親乞巧樓

歐陽詩話云建宮詞百首多言唐禁中事皆史傳小說所不載往往見於

其詩

霓裳詞

傳呼法部按霓裳新得承恩別作行日晚貴妃樓上看

內人昇出綵羅箱

朝元閣上風初起夜聽霓裳玉露寒宮女月中更替立

黃金梯滑並行難

御獵

青山直遶鳳城頭，澁水斜分入御溝。  
新教內人唯射鴨，長隨天子苑東遊。

華清宮

酒幔高樓一百家，宮前楊柳寺前花。  
內園分得溫湯水，

二月中旬已進瓜。

風俗通曰：尚書御史所止，皆曰寺。  
天寶四載，置百司於湯所，故有寺。

舊宮人

先帝舊宮宮女在，亂絲猶掛鳳凰釵。  
霓裳法曲渾拋却，獨自花間掃玉堦。

十五夜望月

中庭地白樹棲鴉，冷露無聲濕桂花。  
今夜月明人盡望，不知秋思在誰家。

對酒

為病比來渾斷絕，緣花不免却知聞。  
從來事事關身少，主領春風只在君。

夜看揚州市

夜市千鐙照碧雲，高樓紅裏客紛紛。  
如今不似時平日，

猶自笙歌徹曉聞

題酸棗縣蔡中郎碑

蒼苔滿字土埋龜  
風雨銷磨絕妙辭  
不向圖經中舊見  
無人知是蔡邕碑

廢寺

廢寺亂來為縣驛  
荒松老栢不生烟  
空廊屋漏畫僧盡  
梁上猶書天寶年

贈李愬僕射

和雪翻營一夜行神旗凍定馬無聲遙看火號連營赤  
知是先鋒已上城

贈陳評事

識君雖向歌鍾會說事不離雲水間春夜酒醒長起坐  
鐙前一紙洞庭山

朝天詞寄魏博田侍中

山川初展國圖寬未識龍顏坐不安風動白髯旌節下  
過時天子御樓看

相感君臣總淚流恩深舞蹈不知休  
初從戰地來無物  
唯奏新添十八州

催修水殿宴沂公與別諸侯總不同  
隔月太常先習樂  
金書牌纛彩雲中

無人敢奪在先籌天子門邊送與毬  
遙索綵箱新樣錦  
內人舁出馬前頭

御馬牽來親自試珠毬到處玉蹄知  
殿頭宣賜連催上  
未解紅纓不敢騎

老作三公徑獻壽臨時猶自語差池  
私從班裏來長跪捧上金杯便合儀

四海無波乞放閒三封手疏犯龍顏  
他時若有邊塵動不待天書自出山

胡馬悠悠未盡歸玉關猶隔吐蕃旗  
老臣一表求高卧邊事從今遣問誰

威容難盡改頻頻眉目分毫恐不真  
有詔別圖書閣上先教粉本定風神

重賜弓刀內宴回看人城外滿樓臺君臣不作多時別  
收盡邊旗當日來

寄蜀中薛濤校書

萬里橋邊女校書枇杷花裏閉門居掃眉才子於今少  
管領春風總不如

送田侍中歸鎮

去處長將決勝籌迴迴身在陣前頭賊城破後先鋒入  
恣看紅妝不敢收



熨帖朝衣拋戰袍  
夔龍班裏侍中高  
對時先奏牙門將  
次第天恩與節旄

踏著家鄉馬脚輕  
暮山秋色眼前明  
老人上酒齊頭拜  
得侍中來盡再生

功成誰不擁藩方  
富貴還湏是本鄉  
萬里雙旌汾水上  
玉鞭遙指白雲莊

鼓吹旂旗道兩邊  
行男走女喜駢闐  
舊交省得當時別  
指點如今却少年

廣場破陣樂初休彩霧高於百尺樓老將氣雄爭起舞  
管絃迴作大纏頭

將士請衣忘却貧綠窓紅燭酒樓新家家盡踏還鄉曲  
明月街中不絕人

歐陽詹

詹字行周晉江人貞元八年擢第為國子監四門  
助教詹言秀而多思故相常袞觀察福州賞識之  
閩人舉進士自詹始與同年韓愈善

古體詩

銅雀妓

蕭條登古臺  
迴首黃金屋  
落葉不歸林  
高陵永為谷  
妝容徒自麗  
舞態閒誰目  
嗚咽總帷前  
歌聲苦於哭

翫月詩

并序

月可翫翫月古也謝賦鮑詩朧之庭前亮之樓  
中皆翫也貞元十二年甌閩君子陳可封在秦  
寓於永崇里華陽觀予與鄉故人安陽邵楚萇

濟南林蘊潁川陳詡亦旅長安秋八月十五日  
夜詣陳之居修厥翫事月之為翫冬則繁霜太  
寒夏則蒸雲太熱雲蔽月霜侵人蔽與侵俱害  
乎翫秋之於時後夏先冬八月之於秋季始孟  
終十五於夜又月之中稽於天道則寒暑均取  
於月數則蟾兔圓況埃壒不流太空悠悠嬋娟  
徘徊桂華上浮升東林入西樓肌骨與之疏涼  
神魂與之清冷四君子悅而相謂曰斯古人所

以為翫也既得古人所翫之意宜襲古人所翫之事乃作翫月詩詩曰

八月三五夕舊嘉蟾兔光斯從古人好共下今宵堂素魄皎孤凝芳輝紛四揚徘徊林上頭泛灩天中央皓露助流華輕颺佐浮涼清冷到肌骨潔白盈衣裳惜此苦宜翫攬之非可將含情顧廣庭願勿沈西方

答韓十八駕驥吟

故人舒其憤作爾駕驥篇駕取易售陳驥以難知言委

曲感既深咨嗟詞亦殷伊情有遠瀾余志遊其源室在  
周孔堂道適堯舜門調雅聲寡同途遐勢難翻顧茲萬  
恨來假彼二物云賤貴而貴賤世人良共然芭蕉一葉  
妖戎葵一花妍異無材實資手植堦墀前榦楠十圍瑰  
松栢百尺堅固念棟梁功野長丘墟邊傷哉昌黎韓馬  
得不述邇上帝本厚生大君方建元實將庇羣眚庶此  
規崇軒班爾圖永安掄擇其精專君看廣廈中豈有庭  
前萱

李評事公進示文集以詩贈之

風雅不墜地五言始君先希微嘉會章杳冥河梁篇理  
蔓語無枝言一意則千往來更後人澆蕩醺前源傾筐  
實不收樸椒華爭繁大教護微旨哲人生令孫高颺激  
頽波坐使橫流翻昔日越重阻側聆滄海傳逮茲覲清  
揚幸覩青琅編泠泠中山醇片片崑山璫一杯有餘味  
再覽增光鮮對寶豈皆鑒握擎良自妍吾其告先師六  
義今還全

蜀中將迴留辭韋相公

貫之

寧體則雲構方前恒玉食貧居豈及此要自懷歸憶在  
夢關山遠如流歲華逼明晨首鄉路迢遞孤飛翼

太原旅懷呈薛十八侍御齊十二奉禮

前來稱英俊有食主人魚後來曰賢才又受主人車伊  
予亦投刺恩煦胡彫疎既覩主人面又獻主人書餬口  
百家周賃廡三月餘眼見寒序臻坐送秋光除西日愁  
饑腸北風集絺裾升堂有知音此意當何如



自懷州却赴洛途中作

惆悵策疲馬孤蓬被風吹  
昨東今又西冉冉長路岐  
歲晚樹無葉夜寒霜滿枝  
依人恒辛苦冥冥天何知

晨裝行

邨店月西入山枝鷓鴣聲  
求燈徹夜席東囊事晨征  
寂寂人尚眠悠悠天未明  
豈無偃息心所務前有程

同諸公過福先寺律院宣上人房

律座下朝講畫門猶掩關  
叨同靜者來正值高雲間  
寂

爾方丈內瑩然虛白間千燈智慧心片玉清羸顏松色  
落深井竹陰寒小山晤言流曦晚惆悵歸人袞

初發太原途中寄太原所思

驅馬覺漸遠迴頭長路塵高城已不見况復城中人去  
意自未甘居情諒猶辛五原東北晉千里西南秦一屨  
不出門一車無停輪流萍與繫匏早晚期相親

春日途中寄故園所親

客路度年華故園未云返悠悠去源水日日祇有遠始

嘆秋葉零又看春草晚寄書南飛鴻相憶劇鄉縣

賦得秋河曙耿耿送郭秀才赴舉

月沒天欲明秋河尚凝白皚皚積光素耿耿橫虛碧南  
斗接北辰連空濛瀕洞浮高天蕩蕩漫漫皆晶然實類  
平蕪流大川星為潭底珠雲是波中烟鷄鳴漏盡東方  
作空曲蒼蒼曉烟落雁叫疑從清淺驚瀉聲似在沿洄  
泊并州細侯直下孫才膺秋賦懷金門念排雲漢將飛  
翻仰之踴躍當華軒夜來陪錢歐陽子偶坐通宵見深

甘心知慷慨日昭回前程志在青冥裏

汝川行

汝墳春女蠶忙月朝起採桑日西沒輕綃裙露紅羅襪  
半跣金梯倚枝歇垂空玉腕若無骨映葉朱唇似花發  
相歡誰是遊冶郎蠶休不得岐路旁

許州途中

秦川行盡潁川長吳江越嶺已同方征途渺渺烟茫茫  
未得還鄉傷近鄉隨萍逐梗見春光行樂登臺關在旁

林間啼鳥野中芳有似故園皆斷腸

近體詩

送少微上人歸德峯

不負人間累棲身任所從  
灰心聞密行菜色見羸容  
幻世方同誤深居願繼蹤  
孤雲與禪誦別後在何峯

荆南夏夜水樓懷昭丘直上人雲夢李革

無機成旅逸中夜上江樓  
雲靜月如練水涼風似秋  
鳬聲聞夢澤黛色上昭丘  
不遠人情在良宵恨獨遊

早秋登慈恩寺塔

寶塔過千仞登臨盡四維  
毫端分馬頰墨點辨蛾眉  
地迥風彌緊天長日又遲  
因高欲有賦遠意慘生悲

九日廣陵同陳十五先輩登高懷林十二先輩

客路重陽日登高寄上樓  
風烟今令節臺閣古雄州  
泛菊聊斟酒持萸懶插頭  
情人共惆悵良久不同遊

咏德上太原李尚書

那以公方郭細侯并州非復舊  
并州九重帝宅司丹地

十萬兵樞擁碧油  
鏘玉半為趨閣吏  
胥金皆是走庭流  
王褒見德空知頌  
身在三千最上頭

奉和太原鄭中丞登龍興寺閣

青窻朱戶半天開  
極目凝神望幾迴  
晉國頽墉生草樹  
皇家瑞氣在樓臺  
千條水入黃河去  
萬點山從紫塞來  
獨恨侍遊違長者  
不知高意是誰陪

薛舍人使君觀察韓判官侍御許雨晴到所居既  
霽先呈即事

江皋昨夜雨收梅

江南夏雨曰梅

寂寂衡門與釣臺西島落花

隨水至前山飛鳥出雲來觀風駟馬能言駐行縣雙旌許  
暫迴豈不偶然聊為竹空令石徑掃莓苔

題延平劍潭

想像精靈欲見難通津一去水漫漫空餘昔日凌霜色  
長與澄潭生晝寒

秋夜寄弘濟上人

尚被浮名誘此身今時誰與德為鄰遙知是夜檀溪上



月照千峯為一人

許州送張中丞出臨潁鎮

心誦陰符口不言風驅千騎出轅門  
孫吳去後無長策誰敵留侯直下孫

宿建溪中宵即事

蔭窮一席眠還坐蛙噪螢飛夜未央  
僮僕舟人空寂寂隔簾微月入中倉

九日廣陵登高懷邵二先輩

簪萸泛菊俯平阡飲過三杯却惘然十歲此辰同醉友  
登高各處已三年

柳淡

淡字中庸河東人有文名蕭穎士愛其才以女妻  
之仕為洪府戶曹

近體詩

幽院早春

草短花初拆苔青柳半黃隔簾春雨細高枕曉鶯長無

事含閒夢多情識異香欲尋蘇小小何處覓錢塘

夜渡江

一作姚崇詩

夜渚帶浮烟蒼茫晦遠天舟輕不覺動纜急始知牽聽  
笛遙尋岸聞香暗識蓮唯看去帆影常似客心懸

寒食戲贈

春暮越江邊春陰寒食天杏花香麥粥柳絮伴鞦韆酒  
是芳菲節人當桃李年不知何處恨已解入箏絃

涼州曲

關山萬里遠征人一望關山淚滿巾  
青海戍頭空有月黃沙磧裏本無春

征人怨

歲歲金河復玉關朝朝馬策與刀環  
三春白雪歸青塚萬里黃沙遶黑山

張繼

繼字懿孫襄州人登天寶進士第大歷末授檢校  
祠部員外郎分掌財賦於洪州

近體詩

晚次淮揚

微涼風葉下，楚俗轉清閒。  
候館臨秋水，郊扉掩暮山。  
月明潮漸滿，露濕雁初還。  
浮客了無定，萍流淮海間。

會稽秋晚奉呈于太守

寂寞訟庭幽，森森戟戶秋。  
山光隱危堞，湖色上高樓。  
禹穴探書罷，天台作賦遊。  
浮雲將越客，歲晚共淹留。

送張中丞歸幕

獨受主恩歸當朝似者稀玉壺分御酒金殿賜春衣拂  
席流鶯醉鳴鞭駿馬肥滿臺簪白筆捧手戀清輝

馮翊西樓

城上西樓倚暮天樓中歸望正悽然近郭亂山橫古渡  
野莊喬木帶新烟北風吹雁聲能苦遠客辭家月再圓  
陶令好文常對酒相招那惜醉為眠

閭門即事

耕夫占募逐樓舡春草青青萬頃田試上吳門看郡郭

清明幾處有新烟

楓橋夜泊

月落烏啼霜滿天江邨漁火對愁眠  
姑蘇城外寒山寺夜半鐘聲到客船

張南史

南史字季直幽州人以試參軍避亂居於楊子再  
召未赴而卒

近體詩

穀卿宅夜宴

日暗城烏宿天寒捩馬嘶詞人留上客妓女出中閨積  
雪連燈照回廊映竹迷太常今夜宴誰不醉如泥

陸勝宅秋暮雨中

探韻  
同作

同人永日自相將深竹閒園偶辟疆已被秋風教憶鱸  
更聞寒雨勸飛觴歸心莫問三江水旅服從沾九月霜  
醉裏欲尋騎馬路蕭條幾處有垂楊

春日道中寄孟侍御



春來遊子傍歸路時有白雲遮獨行水流亂赴石潭響  
花開不知山樹名誰家魚網求鮮食幾處人烟事火耕  
昨日已嘗春酒熟一杯思與孟嘉傾

蘇渙

渙少喜剽盜善用白弩巴蜀商人苦之號白跖以  
比莊蹻後折節讀書登第湖南崔瓘辟為從事瓘  
遇害渙走交廣與哥舒晃反誅

杜甫贈渙詩序云誦近詩數首才力素壯詞句動

人憶其湧思雷出書篋几杖之外殷殷留金石聲  
高仲武云渙知非變節復扇亂侵敗王畧此猶蛟  
龍見血本質彰矣變律詩文意長於諷刺亦有陳  
拾遺一鱗半甲昔漢策紀蒯通說詞皇史錄祖君  
彥書檄豈但不棄雕蟲亦以寓戒君子

古體詩

變律詩

日月東西行照在大荒北其中有燭龍靈怪人莫測開

目為晨暉閉目為夜色一開復一閉明晦無休息居然  
六合內曠哉天地德天地且不言世人強喧喧

毒蜂成一窠高掛惡木枝行人百步外目動魂亦飛長  
安大道旁挾彈誰家兒右手持金丸引滿無所疑一中  
紛下來勢若風雲隨身如萬箭攢宛轉迷所之徒有疾  
惡心奈何不知機

養蠶為素絲葉盡蠶不老傾筐對空林此意向誰道一  
女不得織萬夫受其寒一夫不得意四海行路難禍亦

不在大福亦不在先世路險孟門吾徒當勉旃

懷素上人草書歌兼送謁徐廣州

張顛歿來二十年謂言草聖無人傳零陵沙門繼其後  
新書草字大如斗興來走筆如旋風醉後耳熱心更克  
忽如裴旻舞雙劍七星錯落纏蛟龍又如吳生畫神鬼  
魑魅魍魎驚竄空鉤鎖相連勢不絕倔强毒蛇爭屈鐵  
西河舞劍氣凌雲孤蓬自振唯有君今日華堂看灑落  
四座喧呼歎佳作回首邀余賦一章欲令羨價齊鍾張

琅琅誦句三百字何似醉僧顛復狂忽然告我遊南溟  
言祈亞相求大名亞相書翰凌獻之見君絕意必深知  
南中紙價當日貴只恐貪泉成墨池

鄭常

常氏里莫詳品彙云肅代間人

近體詩

寄邢逸人

美君無外事日與世情違地僻人難到溪深鳥自飛儒

衣荷葉老野飯藥苗肥疇昔江湖意而今憶共歸

御定全唐詩錄卷五十六